



Gabinete Wever - Croes II

ISLA ((•)) NLINE

Diaranson 20 April 2022

Email: IslaOnline@gobierno.aw Tel: 528-4952

NOTICIA DI GOBIERNO



20
22

AÑA DI
INVERSION Y
OPORTUNIDAD



E AÑA AKI LO BAY MIRA MAS MOVECION DEN DIRECCION DI UN GOBIERNO MAS DIGITALISA



E tema di digitalisacion y automatizacion di Gobierno ta encera diferente aspecto entre otro e procesonan di ley cu ta stipula duracion di proceso di permiso pa tereno por ehempel. Pero tambe e intercambio di informacion di ciudadanonan, entre diferente departamentonan. Prome Minister Evelyn Wever - Croes ta duna un update di e procesonan aki.

Tin diferente Minister cu ta encarga cu automatizacion di diferente proceso manera entro otro Minister Geoffrey Wever ta encabesa y ta atendiendo cu e tema di negoshi y diferente red-tape y burocracia cu ta stroba cu e procesonan por bay mas lihe. Minister Dangui Oduber ta encarga cu e vergunningen di horeca (hotel y restaurant) y tin un plan di con pa esaki bay mas lihe.

Prome Minister a sigui splica cu pa loke ta DIP y e permisonan, desde prome di januari a automatiza e parti di peticion pa permiso, pero awo falta e resto di e proceso.

Manera cu ta conoci, tin demasiado atraso na DIP incluyendo mas cu 1000 peticion pa tereno comercial. Ta importante pa menciona cu e procesonan no ta pega solamente pa falta di digitalisacion. Eynan tin problema entre otro a causa di investigacionnan basa riba fraude cu tabatin cu tereno, cu ta

stroba e proceso aun mas. Pero ta trahando riba un plan con pa elimina e retraso pa por otorga e terenonan, Premier Wever - Croes a expresa.

E-GOVERNMENT

“Tin tambe e proyecto di E-Government cu a pasa e proyecto piloto. Tur cos a bay bon cu e departamentonan cu a participa den e proyecto, y e departamentonan por a intercambia informacion facil cu otro. Aworaki ta trahando pa expande esaki, y haci posibel pa mas departamento por conecta na e sistema y intercambia informacion mas facil.”

PREPARACION DI PERSONAL

Pa loke ta trata personal, mester menciona cu nan tambe ta un parti integral di e procesonan nobo y lo percura pa tur personal siña con pa traha cu e sistema. Y unda cu ta necesario lo yuda cu herscholing, omscholing y/of bijscholing. Prome Minister a enfatisa cu no mester tin preocupacion, pasobra tur personal lo ta parti di automatizacion di e procesonan como e personanan cu lo bay traha cu e sistemanan.

FONDO DISPONIBEL

“E reto mas grandi cu tin na e momentonan aki ta financiero pues ta trahando e aña aki cu loke tin. Pendiente pa ricibi e fondo cu a aplica pe di Union Europeo cu lo ricibi na 2023. Pues otro aña cu tin mas espacio financiero, lo por realiza mas cos.”

Pa conclui, Prome Minister a bisa cu no tin un fecha definitivo pa realiza tur e procesonan di digitalisacion, pa motibo cu ta depende di e fondo cu tin accesibilidad na dje. Pero, comunidad lo bay mira mas departamento alinea cu otro. “Por bisa si cu Censo y Departamento di Impuesto pronto lo ta completamente alinea cu otro, cual lo encera cu ta un solo caminda mester duna bo informacion. Pues a traves di e pasonan aki, comunidad lo mira mas movecion den un Gobierno mas digitalisa e aña aki”, Prome Minister a termina bisando.



A INICIA PROYECTO DI "VEILIGE BARIO'S" HUNTO CU CEDE ARUBA

Recientemente Minister di Husticia y Asuntonan Social Sr. Rocco Tjon a reuni cu directiva di CEDE Aruba den cuadro di proyecto di Veilige Barios. Manera ta conoci, e proyecto aki a wordo aproba den presupuesto 2022 pa parlamento di Aruba, cu e meta pa ofrece mas na nos hobennan den e barionan.

Ministerio di Husticia y Asuntonan Social ta considera e inversion den barionan uno hopi importante, mirando cu ta inverti den e parti di prevencion. Recientemente a haci un estudio enfoca riba e calidad di bida di nos hobennan, y esaki a efantisa e importancia di percura cu den barionan tin actividadnan pa nos hobennan. Pa e motibo aki, ta importante pa inverti den nos barionan na un manera sostenibel. A traves di e inversionnan aki ta haci nos barionan menos atractivo pa tur tipo di criminalidad. Esaki ta un oportunidad unico pa transforma dicho barionan, den barionan cu ta ofrece oportunidadnan na hobennan pero tambe na henter comunidad.

CEDE Aruba hunto cu Ministerio di Husticia y Asuntonan Social lo ehecuta e proyecto aki, den cual e meta lo ta pa transforma nos centro di barionan a largo plaso. Ademas di Ministerio di Husticia y Asuntonan Social e proyecto aki ta conta cu sosten di tres ministerio mas, esta; Ministerio di Deporte y Enseñansa, Ministerio di Labor, Integracion y Energia, Ministerio di Integridad, Naturalesa, Transporte y Cuido di Grandinan.

Den cuadro di e proyecto lo duna e debido atencion na e mantencion di e centro deportivonan y e parkenan pa nos hobennan, lo percura pa barionan ta miho ilumina, lo percura pa e situacion di trafico ta uno mas sigur pa nos muchanan y lo bin cu mas afterschool programs entre otro.

Por ultimo, e mandatario a señala cu dentro di poco lo firma un MOU cu e diferente ministerionan y demas partners cu ta hunga un rol clave, pa asina garantisa cu e proyecto aki por sigui un trayecto a largo plaso. A logra delinea e liña di tempo pa cu e proyecto aki, y fin di luna lo duna un presentacion na tur e centronan di bario, pa por inicia ehecutacion di a "afterschool" programs.





MINISTER ENDY CROES TA FELICITA SR. DITO KOOLMAN CU A CUMPLI 70 AÑA

Bunita celebracion di bida hunto cu famianan y invitadonan

Diasabra ultimo den compania di famia, amistadnan y invitadonan sr. Dito Koolman a celebra su 70 aña di edad. Minister Endy Croes a pasa sorprende sr. Koolman na su residencia na Papilon pa felicite riba su dia special, su fecha natal. Un fiesta yena cu ambiente, un celebracion di 70 aña maravioso y ameno di kita sombre.

Pa yega edad di 70 aña sigur ta un bendicion grandi, añanan di experiencia, conocimiento den bida y ta traspasa esaki sigur pa siguiente generacionnan. Minister Endy Croes ta gradici sr. Dito, esposa Imelda y famianan presente pa cu e invitacion aki, na un ocasion asina special, celebrando bida. Masha pabien Dito y hopi aña mas di bida y salud.



20 | AÑA DI
22 | INVERSION Y
OPORTUNIDAD



INVERTI DEN BO MES,
TA E MIHO INVERSION CU BO POR HACI.
E TIN POCO RISICO Y
TA GARANTISA RESULTADO GRANDI.